

# Xroon yuxin tsikjin ndo Pablo xruen'en ndo sen ste tjajna Corinto

**Ndo Pablo kjin ndo xroon  
ngajin sen tjajna Corinto**

**1** <sup>1</sup>\*Jan'an, Pablo, apóstol nche'e xrée ndo Dio, kuinchena ndo ixi sinta'a ixra ngajin Ncháina Jesucristo, jan'an ko ndo ndo kichuuna Timoteo ikjinna xroon ji'i, xruan'anna ngajinnta ti stenta ningue ndo Dio tjajna Corinto ko kaxon kain sen kichuuna titikaon Ncháina Jesucristo ste nchijíi nunte Acaya. <sup>2</sup>Ndotáina Dio ko Ncháina Jesucristo sintanchaonnta ndo ko xrotjáanta ndo juaxruxin.

**Ndo Dio tingijnana ndo  
nchakon tangi tatsingana**

<sup>3</sup>Juasie ndo Dio, Ndotée Ncháina Jesucristo, tikonóajina ndo ko kain nchakon tingijnana ndo ixi juaxruxin tsinteena. <sup>4</sup>Je'e ndo tingijnana ndo nchakon tatsingana juachjaon, ixi jaña kaxon tsingijnana ikaxin sen kichuuna, nchakon xrojan juachjaon xrochóna

sen. <sup>5</sup>Jan'anna tsango ijié juachjaon chondana xranchi juachjaon kuichóna ndo Cristo, ko jaña kaxon ixi je'e ndo jaina chondana juaxruxin.

<sup>6</sup>Jan'anna tangi stena ixi ja'anta xrobake'enta juaxruxin. Ndo Dio tingijnana ndo ixi jan'anna tsjachana tsingijnananta kaxon, ko jaña ja'anta chao tsatsinganta nge'e tangi tson'annta xranchi ti tangi tatsinga jan'anna. <sup>7</sup>Ko nónana ixi nduaxin titikaonnta Ncháina Jesucristo, méxin siá jai tangi chondanta juachjaon xranchi jan'anna, nónana kaxon ndo Dio tsingijnanta ndo xranchi bingijnana ndo jan'anna.

<sup>8</sup>\*Kichuuna, tja'onna tsono'anta kain nge'e tangi kuatsingana ti kuinteena nunte Asia. Tsango ijié juachjaon kuachondana, méxin xraxa'onna ndaxrokuen'enna. <sup>9</sup>Jan'anna konónana xranchi ndaxrokuen'enna nti'a. Ti tangi kónana me'e juakonana ixi xrochuntia'ina ngajin jan'onna, xrokonda xrochuntiana ngajin

ndo Dio, ndo nchexechón ni tsiken'en. <sup>10</sup> Je'e ndo bingijnana ndo kuatsingana kain juachjaon ko ngajin je'e ndo chuntiana ko nónana kaxon ixi xratsingijnana ndo. <sup>11</sup> Ja'anta tingijnananta ti nichje'enta ndo Dio ixi je'e ndo tsingijnana ndo. Ko siá itsjé sen xronichje'e sen ndo Dio, jaña kaxon itsjé sen tsajon sen juasaya ngajin ndo ixi je'e ndo kuingijnana ndo.

**Sonda jui'a ndo Pablo  
tjajna Corinto**

<sup>12</sup> Juaxruxin stena ixi nónana ndako junta'ana ko xro'an ngisen juntaya'ana, kaxon ndako junta'ana ngajinnta. Ko je'a ixi juachaxinnana junta'ana jaña. Na'i. Juachaxien ndo Dio me'e ti bingijnana junta'ana jian. <sup>13</sup> Jan'anna stekjinna xroon tsaye'enta ko ti ikjinna tangi'a tsiexinnta ko tja'onna ixi tsiexinnta jian <sup>14</sup>ixi jai ja'anta ó tienxinnta naanchichjaon, ko nchakon xrokjan Ncháina Jesús tsake'enta juaxruxin ixi jan'anna jian juntakuan'annanta, ko kaxon jan'anna juaxruxin stena ixi ja'anta jian kuitikaonnta.

<sup>15</sup> Jan'an xraxa'on ixi sa'ó xrojuasótsja'anta ixi juaxruxin xrokuunteenta ixi ó yuxin xrobikon kichuuna. <sup>16</sup> \*Méxin xraxa'on xrojuasótsja'anta nchakon saxrokjui nunte Macedonia ko kaxon nchakon

xrokjanxinna nti'a. Ko jaña ja'anta xrobingijnantana saxrokjui nunte Judea. <sup>17</sup> ¿Á xraxaonnta ixi je'a jian xraxa'on nchakon ndachrjan sa'ó ixi xrojuasó nti'a? ¿Á xraxaonnta ixi jan'an nta'a xranchi ngixe'i naa chujni ixi sa'ó ndachrjan xrojuasó ko tjume'e ina'i? <sup>18</sup> Ndo Dio no'e ixi je'a jaña xraxa'on xrojuinta'a. Nchakon ndachrjan jaán, jaña tson'en, ko nchakon ndachrjan na'i, jaña tson'en kaxon. <sup>19</sup> \*Ixi ndo Silvano ko ndo Timoteo ko jan'an juako'ananta chijnie ndo Cristo Jesús, chjen'en ndo Dio, nchakon bake'ena nti'a; ko je'e ndo Cristo ncheya'i ndo; ixi ti ndachro ndo me'e nche'e ndo. <sup>20</sup> Ixi kain nge'e tsichronga ndo Dio sinche'e ndo, ndo Cristo kuitikaon ndo ko jaán nche'e ndo kain. Méxin, nchakon nichjana ngajin ndo Dio ndachrona “Jaña tson'en”, ixi juachaxien ndo Cristo Jesús. <sup>21</sup> Ndo Dio tingijnana ndo jan'anna ko ja'anta ixi tsitikaonna ndo, ko je'e ndo kuiya'ina ndo ixi tjúá tsintee aséeina, <sup>22</sup> ko me'e juako ndo ixi jaina tikinixin'enna ndo, méxin, bake'e ndo chji'e ndo ngajin jaina, me'e Espíritue ndo chóna aséeina ixi jaña tsonoina nduaxin tsayé'ena ti ndachro ndo tsajon ndo.

<sup>23</sup> Siá xrata'i cha'o ixi tjasotsja'anta tjajna Corinto xranchi xraxa'on, ndo Dio no'e

ndo ixi je'a ixi tjaun'a tsjaso. Na'i, xrasatji'a ixi tjaun'a sintani'a asáanta ixi tuinxin tjaso. <sup>24</sup>Je'a ixi xrokuetuan'annta xranchi xrochuntianta Ncháina. Na'i, ixi ó nóna ixi jian chuntianta ndo. Je'o tja'onna ixi tsingijnana ícha tsake'enta juaxruxin.

**2** <sup>1</sup>Tjaun'a tsoni'e asáanta, méxin, ndajuaso'a ngajinnta. <sup>2</sup>Ixi siá tsoni'e asáanta, ¿tjume'e ngisen xrochjána juaxruxin? ¿Xronkanta ti kondanaxin jan'an koni'e asáanta? <sup>3</sup>Méxin, ikjin xroon xruan'annta ko juaso'a ngajinnta ixi tjaun'a xrojuinchení'enta aséenna. Jan'an tja'on ixi nchakon xrojuasó ja'anta ko jan'anna xrobake'ena juaxruxin. <sup>4</sup>Ko nchakon ikjinna xroon xruan'ananta, tsango jitoni'e aséenna ko tsjanga kaxon. Ko je'a ikjin xroon ixi kaxon xrokoni'e asáanta. Na'i, jaña juinta'a ixi tja'on xrokono'anta ixi tsango tjua'anta.

**Ndo Pablo íxraxaon'a ndo nge'e juinche'e naa xi**

<sup>5</sup>Tjaun'a ícha xronichja ixi xi juincheni'e aséenna, ixi je'e xa je'a jan'on juinchenina xa. Na'i. Kaxon juincheni'e xa aséen kain ja'anta. <sup>6</sup>Kueyanta nichje'enta xa ko koyakutéenta xa, ó chao, íxro'an nge'e ndachenta xa. <sup>7</sup>Jai ó nchemé'enta ngaya asáanta

ti ndako'a juinche'e xa ko tingijnanta xa, ixi bā kondeexin juachjaon me'e tsitjáña aséen xa. <sup>8</sup>Tinóatáana ngajinnta, tjako'enta xa ixi nduaxin tjeue'enta xa. <sup>9</sup>Xroon sa'ó kjin'annta ixi tja'on tsonóna á nduaxin kuitikaonnta nge'e kuetuan'annta. <sup>10</sup>Ko siá ja'anta tjáña'anta ti ndako'a juinche'e xa, kaxon jan'an ó tjáñana nge'e juinche'e xa. Méxin, siá xrojan ti ndako'a juinche'e xa, jan'an ó tjáñana me'e, ixi ja'anta jian tsinteenta. Ko ndo Cristo no'e ndo ixi ndatjáñana nge'e juinche'e xa. <sup>11</sup>Ko jaña Xixron'anxrée xro'an nge'e sinche'e xa ngajin jaina ixi jaina ó noina xranchi nche'e xa.

**Ndo Pablo bake'e ndo tjajna Troas**

<sup>12</sup>\*Nchakon ikjui tjajna Troas ixi xrojuako chijnie Ncháina Cristo, konóna ixi je'e ndo kuajon ndo juachaxin xrojuako chijnie ndo nti'a. <sup>13</sup>Ko maski jii juachaxin, jii juachjaon ixi kuitja'i ndo kichuuna Tito. Méxin, tuinxin ntatjan sen ste nti'a satji nunte Macedonia ko tjume'e sakjui.

**Ndo Pablo tajon ndo juasaya ngajin ndo Dio**

<sup>14</sup>Juasie ndo Dio ixi je'e ndo tingijnana ndo ko chondana juachaxien ndo Cristo Jesús. Ko kain ti no tjakona chijnie

ndo, ixi ti tjakona xranchi naa nge'e chaxro xraxe. <sup>15</sup>Ixi kain jaina chaxro xraxena xranchi naa tsjoxraxé tajon ndo Cristo tayé'e ndo Dio ixi jaina tjakona chijni jian ngajin sen chónnda juachaxin tsechón kain nchakon ko ngajin ni xratayé'a juachaxin kaxon. <sup>16</sup>Ngajin ni chónnda'i juachaxin tsechón, ti chaxro xraxe me'e xranchi xrokuenxin na. Ko sen chónnda juachaxin tsechón, ti chaxro xraxe me'e xranchi tajon juachaxin tsechón sen. ¿Ngisen chao tsjacha sinche'e ixra kuetuaina ndo Dio? <sup>17</sup>Ko jan'anna tjancha'ina tomi ixi tjakona chijnie ndo Dio xranchi nche'e ikaxin na. Na'i. Jan'anna ixi nchijí aséenana tjakona chijnie ndo ixi je'e ndo kuinchanana ndo sinta'ana ixra ngajin ndo Cristo.

**Natjúa cha'o tsonchjiñe'eni ngajin ndo Dio**

**3** <sup>1</sup>Ti ndachrjanna ixi jan'anna jian tjakona, ¿á xraxaonnta ixi jan'anna tsango ntajíe aséenana?, o, ¿á xraxaonnta xrokondanana naa xroon xronichja ixi jian jan'anna?, o, ¿á xrokonda tjancha'ananta naa xroon xrondachro ixi jian nta'ana ixra, xranchi tjanchia ikaxin na? <sup>2</sup>Na'i, ja'anta xrokjuinta xranchi xroon me'e, jitjaxin ngajin aséenana ko me'e tsichuxin chujni ko tsonoexin chujni ti jian nta'ana. <sup>3</sup>Me'e tsikonxinni

ixi ja'anta xrokjuinta xranchi naa xroon chrjiki'anna tsikjin Ncháina Jesucristo tsonoexin chujni ixi ixra jian nta'ana. Ko je'a ixi ndana'ó tsikjinxin ndo xroon me'e. Na'i. Je'e ndo kuajon ndo Espíritue ndo ti jichón kuaye'enta. Ko je'a ngata'a naa xro tsikjin ndo. Na'i. Je'e ndo tsikjin ndo ngaya aséen chujni.

<sup>4</sup>Ko kain ji'i noina ixi nduaxin titika'onna ndo Dio ko ndo Cristo tingijnana ndo. <sup>5</sup>Ko jua'i xrondachrona ixi je'o jaina chao sintu'una naa ixra. Na'i. Ndo Dio, me'e ndo tingijnana ko chjaina ndo juachaxin, méxin, chao nche'ena xra kuituan'an ndo.

<sup>6</sup>Je'e ndo chjaina ndo juachaxin ixi sinche'ena ixra ngajin ndo ko xra me'e naa chijni natjúa juinchéña ndo. Ko chijni ji'i je'a naa ley jitaxin. Na'i. Ji'i naa juachaxin kuajon Espíritue ndo Dio. Ixi ley me'e teenxin chujni, ko Espíritue ndo tajon juachaxin stechón chujni kain nchakon.

<sup>7</sup>Kondeexin ley bakeenxin chujni ko ley me'e jitaxin ngata'a naa ixro ko tsango ijíe chjiixro bika'o ley me'e, méxin sen israelita jua'i tsje'e sen ngaya ikon ndo Moisés ixi tsango tóngíxin. Ko ti tóngíxin me'e jitjexin. <sup>8</sup>Siá jaña bikon sen chjiixro me'e, jai ícha tóngíxin chijni natjúa kuaye'ena ixi juachaxien Espíritue ndo Dio. <sup>9</sup>Ko ley tsango tóngíxin me'e banchekama ijíe tsenxin chujni; jai ícha jian ko ícha chaxro

chijni ne'e ndo Dio tsontjúáxin aséeina ko tsom'e ijie chondana. <sup>10</sup>Méxin, ti ijie juachaxin kuachóna ley íxro'an tjintee xranchi ijie juachaxin chóna chijni natjúá jai. <sup>11</sup>Siá ley sa'ó kuachóna ijie juachaxin ko juachaxin me'e yao juexin, jai ícha chóna ijie juachaxin chijni natjúá tsake'e kain nchakon.

<sup>12</sup>Ko jaina stechon'enna nge'e tsjexin'a, méxin, xroxakon'ana xronichjana kain ji'i. <sup>13</sup>Ko nta'ina xranchi juinche'e ndo Moisés, bixeexin ndo naa manta ngaya ikon ndo ixi tsikon'a sen israelita ixi jitjexin ti jitóngíxin. <sup>14</sup>Ko sen israelita kuienxin'a sen chijni me'e ko hasta ti jai ti xranhekuanxin sen nge'e kuetuen'en sen ó sa'ó, xranchi xrochonda sen manta jijeexin ngaya ikon sen ko tienxin'a sen ti nchekuanxin sen. Ko je'e sen tsienxin sen chijnie ndo Dio je'o siá tsitikaon sen ndo Cristo, me'e tsitjáña manta tsijijeexin ngaya ikon sen. <sup>15</sup>Ko ti nchakon jai ti nchekuanxin sen xroon tsikjin ndo Moisés tienxin'a sen ixi xrajijexin manta ngaya ikon sen. <sup>16</sup>Ko nchakon naa ngisen taxi titikaon sen Ncháina Jesús, manta me'e ísingakuen'a manta. <sup>17</sup>Ncháina<sup>a</sup> Jesús me'e Espíritue ne'e ndo Dio. Ko ti no jii Espíritue ndo Dio, xro'an nge'e tije'e. <sup>18</sup>Ko kain jaina íxro'an manta jijeexin ikonna; jaina

stena xranchi naa xrosenda tóngíxin ixi tjakona juachaxien Ncháina, ko je'e ndo tindoxin ndo ti xraxaonna. Kain ji'i ton'en ixi ixra nche'e Espíritue ndo Dio ngaya aséeina, ko jaña ícha ko ícha stena xranchi jii je'e ndo.

### Sen chronga chijnie ndo Cristo

**4** <sup>1</sup>Ixi ndo Dio tsango bikonóa'nana ndo ko chjánana ndo juachaxin sinta'ana xree ndo; méxin, tonchrje'ana ko ícha nta'ana xree ndo.

<sup>2</sup>Xro'an nge'e imao nta'ana, méxin tosuana'ina, ko ntaya'ina chujni ko tindoxin'ana chijnie ndo Dio. Ndo Dio jian no'e ndo ixi jan'anna nichjana nge'e nduaxin, méxin chao xrochuntia sen ngajinna. <sup>3</sup>Ko ni tienxin'a chijnie Ncháina ti tjakona, ni me'e tsitjáña na méxin tienxin'a na. <sup>4</sup>Ko ni me'e tienxin'a na ixi xiña'i tetuan'an nunte xasintajni tsijje'e xa ikon na ixi tsienxin'a na ko tsikon'a na xranchi tingasáña chijnie ndo Cristo ixi Ndo Cristo naxraje'o xranchi ndo Dio xexi ndo. <sup>5</sup>Nchakon tjakona, je'a tjakona ti xraxa'on jan'anna. Jan'anna tjakona ixi tsitikaonnta ndo Jesucristo xranchi Ncháanta, ko jan'anna nta'ana ixra ixi tsingijnananta ixi tjua'ana ndo Jesucristo. <sup>6</sup>Ko ndo Dio kuetuan'an ndo ixi xro'i tsingasáñaxin ti naxixe'e, kaxon je'e ndo juinchengasáña

<sup>a</sup> 3:17 *Ncháina* Señor *Ncháina Jesús o Ncháina Dio*

ndo ngaya aséeina ixi jaña xrochuxinna juachaxin ijié chónnda ndo Dio, juachaxin tingasáñaxin ngaya ikon Cristo.

**Ixi chuntiana Ncháina  
Jesucristo me'e jian tsojuna**

<sup>7</sup>Ko cuerponana jii xranchi naa ichi tsikónaxin ncheta'o tjinga nge'e tsango tjintee, ixi jaña tsjakoxinna ijié juachaxin chjajina ndo Dio ko je'a juachaxinnana.

<sup>8</sup>Maski xrojan nge'e tangi tsatsingana, tonchrje'ana. Maski xrochondana juachjaon, jan'anna chuntiana ngajin ndo Dio. <sup>9</sup>Maski tengina na, ndo Dio tintuna'ina ndo. Maski itsjé nge'e nchenana na ixi tjaunna tsjánkana na, jua'i sinchetjáñana na. <sup>10</sup>Ngixe'i ti no itjina, tjakona ti tangi tatsingana xranchi tangi juinchekao na Ncháina Jesús ti kuen'en ndo, ko ti titika'onna ndo jai tjakoxinna ixi je'e ndo jichón ndo ngaya aséeina.

<sup>11</sup>Ixi jaina ti stechónna, kain nchakon chondana juaxrakon ixi tsen'enna ixi titika'onna ndo Jesús, ko kaxon jaña tsjakoxinna ti ijié juachaxin chónnda ndo.

<sup>12</sup>Méxin, jan'anna steten'enna ko ja'anta xrochondanta juachaxin tsarichonnta.

<sup>13</sup>Ixi jan'anna xraje'o chuntiana xranchi ndachro xroon chijnie ndo Dio tsikjin sen ó sa'ó: "Kuitika'on méxin, nichja", ko kaxon jan'anna

kuitikaonna, méxin, nichjana.

<sup>14</sup>Méxin, noina ixi ndo Dio, ndo juinchechón Ncháina Jesús, kaxon sinchechónna ndo jaina, ko tjume'e ja'anta ko jan'anna satsiku'una ndo ti tituan'an ndo.

<sup>15</sup>Kain ji'i kon'en ixi jaña jian tsintee ja'anta. Ixi siá ícha kueya sen tsayé'e sen juachaxien ndo Dio, jaña kaxon ícha itsjé sen tsajon sen juasaya<sup>b</sup> ngajin ndo ixi je'e ndo chónnda ndo kain juachaxin.

<sup>16</sup>Méxin, tonchrje'a aséenana maski jitjexin cuerponana, ndo Dio ícha sinchesoji ndo aséenana ngujngu nchakon. <sup>17</sup>Ko maski tangi tatsingana ngata'a nunte nti'i, ji'i tsonchrjen'a, tuinxin tsatsinga juachjaon ko kondeexin me'e, ndo Dio xrochjaina ndo ijié juachaxin ti nai'a tsjexin.

<sup>18</sup>Méxin, ta'ina juachjaon ixi nge'e tangi tatsingana nunte xasintajni, ixi kain me'e tuinxin tsatsinga. Ko xraxaonna nge'e xratikon'ana ixi ti tikonna tuinxin tsjexin ko ti nge'e jian xratikon'ana nai'a tsjexin.

**Nchia xrochondana ngajni**

**5** <sup>1</sup>Noina ixi cuerpoína jii xranchi naa nchia, ko cuerpoína me'e tsjexin naa nchakon. Ko ndo Dio juinchekonchjian ndo naa nchia natjúá jii ngajni tsayé'ena, ko nchia me'e nai'a tsjexin nchia ixi je'a itja chujni tsikonchjianxin nchia.

<sup>b</sup> 4:15 *juasaya* respeto, honor

<sup>2</sup>Ti xrastena nti'i, tsango taabana ixi tjaunna xrochondana cuerpo natjúá jii ngajni. <sup>3</sup>Ko nduaxin xrochondana naa cuerpo natjúá ko jian sinchekitsáana ndo, je'a turuchuna tsinteena nti'a. <sup>4</sup>Ti xrochondana cuerpoina ji'i, tsango taabana ko toni'e aséeina ko je'a ixi tjaunna tsintu'ena cuerpo ntaxi. Na'i, jaina tjaunna xrochondana naa cuerpo tsen'a ixi tsechónna kain nchakon. <sup>5</sup>Ko je'e Ndo Dio juinchéñana ndo ixi tjaun ndo tsayé'ena inaa cuerpo natjúá, méxin kuajon ndo Espíritue ndo kuaye'ena ixi jaña tsonoina ixi nduaxin tsayé'ena nge'e tsajon ndo.

<sup>6</sup>Méxin jian chuntiana ko juaxruxin tsinteena ti xrochondana cuerpoina nunte nti'i, maski xrasatsji'ana ngajin Ncháina. <sup>7</sup>Ko maski jua'i tikonna ndo, jaina chuntiana ngajin ndo. <sup>8</sup>Ko jaña chuntiana ndo, ícha jian xrokuintu'ena cuerpoina ixi saxrokjuina ti jii Ncháina Jesucristo. <sup>9</sup>Méxin xrokonda ícha sinche'ena ti tjaun Ncháina, siá xrastena nti'i o na'i, <sup>10</sup>\*ixi kaina xrokonda tsonchjiñe'ena ti sinchéñaxin ndo Cristo ijié ixi jaña ngujnguna tsayé'ena nge'e tikinixinna ixi á jian juinche'ena o na'i ti xrastena ngata'a nunte nti'i.

**Chijni tajon juaxruxin  
tsinteena ngajin ndo Dio**

<sup>11</sup>Ko jaina ó noina ixi xrokonda xrochonde'ena ndo Dio juasaya,

méxin ndachena chujni chijnie ndo ixi jaña je'e na tsitikaon na ndo kaxon. Ko ndo Dio ó chuxinna ndo ko kaxon ja'anta tja'onna jian tsichuxinninta.

<sup>12</sup>Tjaun'ana ixi xroxaxaon ja'anta ixi tsango jian jan'anna. Na'i. Je'o ndachrjanna ji'i ixi jaña tsake'enta juaxruxin ixi jan'anna jian nta'ana ko jaña xrochondanta nge'e tsjate'enta ngajin ni ndachro tsango jian nche'e na ko je'a nduaxin. <sup>13</sup>Ixi siá ndachro na tsijinchetjáña janana, jan'anna je'o tja'onna tsajonna juasaya ngajin ndo Dio. Ko siá je'a nduaxin tsijinchetjáñana janana, méxin tja'onna tsingijnananta ícha tsitikaonnta. <sup>14</sup>Ti tsango tjua'ana ndo Cristo, me'e tituen'en aséenana ko nónana jian ixi je'o je'e ndo kuen'en ndo ixi ti ndako'a juinche'e kain chujni, méxin jaina xranchi xrokue'enna kaxon. <sup>15</sup>Ko ndo Cristo kuenxin ndo ixi jaina, ixi jaina ti xrostechónna ísinche'ana ti tjaunna. Xrokonda sinche'ena nge'e tjaun ndo ixi je'e ndo kuen'en ndo ko xechón ndo ixi jaina xrochondana juachaxin tsechónna kain nchakon. <sup>16</sup>Jai jaina íroxraxaon'ana á tjintee o na'i inaa chujni xranchi kuaxraxaonna sa'ó. Ko sa'ó kuachuxinna ndo Cristo xranchi ngixe'i naa chujni, ko jai í je'a jaña chuxinna ndo. <sup>17</sup>Ixi ngisen

titikaon ndo Cristo ikjan sen xranchi naa chujni natjúá ixi kain nge'e jintu'una sa'ó ó komé'e ko jai kain nge'e ikjan natjúá.

<sup>18</sup> Kain ji'i ndo Dio juinche'e ndo ixi kuajon ndo chjen'en ndo xjan Cristo kuenxin xjan ixi jaína, ko jaña chao tsonchjiñe'ena ti jii ndo ko kaxon chjaína ndo ixrā ixi xronichje'ena chujni chijnie ndo ko jaña tsonchjiñe'e ícha chujni ngajin ndo. <sup>19</sup> Ixi ndo Dio xruan'an ndo ndo Cristo kuenxin ndo ixi jaína, ko jaña komé'e ti ndako'a juinche'e kain chujni ko kotuaína ndo ixi jaína tsjakona chijnie ndo ngajin chujni nunte xasintajni ko jaña chao tsonchjiñe'e nā ngajin ndo. <sup>20</sup> Jaína chondana juachaxien ndo Cristo ixi xronichjana chijnie ndo ko je'e ndo tjancha'anta ndo ixi tsitikaonnta chijni tjako'annanta. Ko ixi juachaxien ndo Cristo tjancha'ananta tonchjiñe'enta ngajin ndo Dio. <sup>21</sup> Ndo Cristo xro'an nge'e ndako'a juinche'e ndo, ko ndo Dio bikon ndo xranchi ndo Cristo chóna ndo ijie, ixi jaña xrokomé'e kain ijie kuachóna chujni ko jaña íxro'an nge'e sínká nā.

**6** <sup>1</sup> Jan'anna xro nta'a xrée ndo Dio, tjancha'ananta ixi tjáña'inta ti jian tjáanta ndo ko ti tsango tjua'anta ndo. <sup>2</sup> Tsendachro ndo Dio jitaxin chijnie ndo:

Nchakon kuincha'anta ja'anta, kuin'an ti juanchianta.

Ko nchakon kuajon juachaxin tsechón chujni, nchakon me'e kuingijnanta.

Ko nchakon me'e jai, jai nchakon ndo Dio sinchemé'e ndo ti ndako'a nche'e chujni ko tsajon ndo juachaxin tsechón nā kain nchakon.

<sup>3</sup> Tjaun'ana ixi xrojan ngisen xrondachro ndakua'i nta'ana xrā, méxin, ndakoa nta'ana kain nge'e. <sup>4</sup> Kain ixrā nta'ana tjakoxinna ixi xrée ndo Dio nta'ana, maski tangi tatsingana ko jan'anna tokuaxinnana, maski itsjé juachjaon tatsingana ko chonda'ina nge'e xrokondanāna, <sup>5</sup> \*ko kóñana nā ko xraxin'inna nā ndo'achjiso ko tsango itsjé ixrā junta'ana, ko ste kaxin nchakon juine'ana ko kuarichrin'ana. <sup>6</sup> Ko maski kain nā juinchenāna nā, xro'an ngisen xrondachro ixi ndakua'i junta'ana ixi nónana nge'e nduaxin, taka'i chjánāna juaño, ko jian nichja'ana nā ixi Espíritue ndo Dio jii ngajinna, ko nduaxin tjua'ana chujni, <sup>7</sup> ko ixi juachaxien ndo Dio nichjana chijni nduaxin ne'e ndo, ko nchakon tangi tatsingana, jian nichjana ixi jaña tjakoxinna nta'ana ti jian. <sup>8</sup> Kaxin nchakon jian nichja'nana nā ko ikaxin nchakon na'i. Kaxin nchakon



nichja nā kontranāna ko ikaxin nchakon na'i. Ko maski nichjana nge'e nduaxin, je'e nā ndachro nā ixi ntayana. <sup>9</sup>Ko maski kaxin nchakon chuxin'ana nā ko ikaxin nchakon jian chuxinna nā. Ko kaxin nchakon tangi tatsingana ixi tjaun nā tsōñāna nā ko xrastechónna. Tjaya nā ngajinna ko xratjacha'i nā naatsónaxónna nā. <sup>10</sup>Maski jitioni'e aséenāna, jan'anna juaxruxin stena. Xranchi ni nóa stena, ko tjá'ana chujni naa chijni tsango tjintee, ko xranchi xro'an nge'e xrochondana, ko jan'anna chondana kain nge'e.

<sup>11</sup>Kichuuna ti stenta tjajna Corinto, jian nichja'ananta ko ntatjunanta ti nduaxin nge'e jii ngaya aséenāna. <sup>12</sup>Jan'anna tsango tjua'ananta. Ko ja'anta je'a nduaxin tjaunnanta.

<sup>13</sup>Tinóatāana ngajinnta, xranchi naa ndotata tinóatée ndo ngajin chjen'en ndo, tjeñauninta xranchi jan'an tjua'anta.

**Jaina ningue ndo Dio,  
ndo jichón**

<sup>14</sup>Titexin'anta ngajin naa ni titikaon'a Ncháina Jesucristo ixi je'a naxraje'o xraxaonna. Me'e jii xranchi kuxinta je'a nataonxin nche'e ba ixrā nchakon ti'te ba. Ko jaña kaxon je'a naxraje'o naa nge'e jian ko naa nge'e ña'i. Ko je'a xraje'o ti tingasáña ko ti naxixe'e. <sup>15</sup>Jua'i tsjento ndo

Cristo ngajin Xixron'anxrée ko jua'i tsekao kichuu naa ni titikaon ndo Cristo ko naa ni titikaon'a ndo. <sup>16</sup>\*Jaina ningue ndo Dio, ndo jichón, ko siá ndo Dio jii ngajinna, jua'i tsitikaonna ngajin naa ídolo, jaña tikinixinna ningue ndo Dio ko je'e ndo tsindachro ndo:

Jan'an tsake'é ko tsajiki'an sen,  
ko jan'an ndo Dio ne'e sen  
ko je'e sen tsikinixin'en sen  
tjajnána.

<sup>17</sup>Méxin, kaxon jaña tsindachro Ncháina:

Tachrxexinnta ti ste ni  
titikaon'a nā najan'an  
ko xro'an nge'e tjúá'i itsenta,  
me'e tsake'enta ngajin.

<sup>18</sup>Ko jan'an Ndotánta,  
ko ja'anta chjan'na, xjan xi ko  
xjan nchri,  
jaña ndachro Ncháina Dio,  
ndo chóna kain juachaxin.

**7** <sup>1</sup>Kichuuna tsango tjua'anta, ko noina ixi tsayé'ena naa nge'e tsajon ndo Dio, méxin, xrokonda tjúá xrochondana cuerpoína ko aséeina, ko tsintu'ena kain nge'e sinchekitjana, ko jaña xrochonde'ena ndo Dio juasaya ko tsitikaonna ndo.

**Sen kichuuna ste Corinto  
ó kuindoxin sen**

<sup>2</sup>Taya'nananta ngaya asáanta ixi xro'an ngisen juintani'ana,

ko xro'an ngisen juintaya'ana. <sup>3</sup>Ndachrjan'i jil'i xisintakamanta ijie. Na'i. Ó sa'ó ntatjunanta xis tsango tjua'ananta, jai ti xrustechónna hasta tsijija nchakon tsen'enna. <sup>4</sup>Tsango chuntia ngajinnta ko tsango stena juaxruxin xis nge'e nche'enta, ko tsango chá'nana maski tangi stena ngata'a nunte xasintajni. <sup>5</sup>\*Xra nchakon juasona nunte Macedonia tjokéna'lina xis nti'i, nda'a jii chujni ningakonnana ko tsango xronkana. <sup>6</sup>Ko ndo Dio, ndo tajon juaxruxin tsake'e aséenna, kuajon ndo juaxruxin bake'e aséennana xis kuji ndo Tito. <sup>7</sup>Ko je'a je'o xis kuji ndo Tito bake'ena juaxruxin. Na'i. Kaxon xis konónana xis juaxruxin bake'e ndo ngajinnta ko ndo Tito ndachijina ndo xis tsango tjaunnta tsikonnanta ko chronga ndo xis tsango stechínta xis nge'e juinche'enta ko tsango taanta juachjaon xis jan'an. Hora kuin'an jil'i, tsango bake'é juaxruxin. <sup>8</sup>Ko xroon kjin'annta sa'ó me'e juincheni'e asáanta ko jai ya'i juachjaon. Ko sa'ó jan'an kua juachjaon xis nge'e kjin'annta xis konóna xis nge'e ndachrjan juincheni'e asáanta kaxin nchakon. <sup>9</sup>Ko jai ritjén juaxruxin, je'a xis ja'anta koni'e asáanta. Na'i, juaxruxin ritjén xis ti koni'e asáanta me'e

kuindoxin nge'e xraxaonnta ko ti kokuaxin'annta ti koni'e asáanta me'e juinche'ruxin'en ndo Dio. Méxin, ti kjin'annta xroon, xro'an ti ndako'a juanta'anta. <sup>10</sup>Xis ti toni'e aséenni xranchi tjaun ndo Dio me'e tindoxin aséenni ko jaña tomé'e ijie chónndani, ko ti ncheni'e aséen chujni kondeexin nge'e jii ngata'a nunte xasintajni me'e tjacha tóna chujni. <sup>11</sup>Ja'anta kukuaxi'annta juachjaon tjáanta ndo Dio, me'e juinche'e ndo juaxruxin ko jai jian stenta ko jian xraxaonnta xis jan'an xro'an ijie chónnda, me'e ja'anta kuingijnaninta xis tsango tjaanta juaño ko xronkanta xis xrojan nge'e xrokon'en. Méxin tjaunnta xrobikonnanta ko xrojuinchejenganta 'na ngisen ndako'a juinche'e ko jaña ja'anta juakoxinnta xis xro'an ijie chondanta kondee nge'e kon'en. <sup>12</sup>Nchakon kjin'annta xroon, je'a xis rixraxa'on ngisen ndako'a juinche'e, ko je'a xis rixraxa'on ngisen koni'e aséen. Na'i. Jaña juanta'a xis ja'anta xrojuakoxinnta ngajin ndo Dio xis tsango kuaanta juachjaon xis jan'anna. <sup>13</sup>Ko jaña juinche'enta, méxin, juaxruxin stena. Ko ícha bake'ena juaxruxin xis tsango jian bake'e ndo Tito ngajinnta xis ja'anta bingijnanta ndo. <sup>14</sup>Jan'an ntatjan ndo Tito xis juaxruxin stena xis ja'anta juinche'enta ti jian, méxin

tosuana'ina kain nge'e ntatjanna ndo Tito. Ko kaxon kain ntatjanna ndo Tito nduaxin me'e ko kaxon kain nge'e ntatjunanta nduaxin ko jaña stena juaxruxin. <sup>15</sup>Ndo Tito tsango juaxruxin jii ndo ixi ja'anta tsango kuitikaonnta ndo ko kuaye'enta ndo jian, méxin ícha tjua'anta ndo. <sup>16</sup>Tsango juaxruxin ritjén ixi nóna chao xrochuntia ngajinnta.

### Jian tsingijna kichuuna

**8** <sup>1</sup>\*Kichuuna, tja'onna tsono'anta xranchi sen titikaon Ncháina nunte Macedonia juako sen xranchi ndo Dio bingijna ndo sen. <sup>2</sup>Maski itsjé juachjaon kuatsinga sen, ko maski nóa sen, juaxruxin bake'e sen ko bingijna sen xranchi nduaxin xrochónnda sen itsjé tomi. <sup>3</sup>Jan'an nóna ixi nduaxin kuajon sen ti chónnda sen ko hasta ti chónnda'i sen kuajon sen ixi jaña kuachrxexin aséen sen. <sup>4</sup>Ko kuinóatée sen ngajinna ixi tsajonna juachaxin tsingijna sen sen titikaon ndo Dio. <sup>5</sup>Ko ícha tsango bingijna sen; je'a xranchi jan'anna xraxa'onna; sa'ó kuitikaon sen ixi nchijí aséen sen ngajin Ncháina Jesucristo, ko tjume'e kuitikaon sen ngajinna xranchi tjaun ndo Dio. <sup>6</sup>Méxin, kuinóatánana ngajin ndo Tito ixi tsja'o ndo tomi ngajinnta xranchi juangíxin ndo juinche'e ndo ó sa'ó. <sup>7</sup>Jian nóna ixi tsango jian nche'enta kain nge'e: jian chuntianta Ncháina Jesucristo,

jian nchekuen'ennta sen chijnie ndo Dio, ícha no'anta chijnie ndo, ko tsango chá'anta ko tjaunninta. Ko jai ícha jian tingijnanta sen kichuuna.

<sup>8</sup>Je'a ritituan'annta sinche'enta jii'i. Na'i. Je'o tja'on tsono'anta xranchi tingijna sen kichuuna ngajin ikaxin sen kichuuna, sen ícha nóa, ixi jaña ja'anta kaxon ícha tsanginta tsingijnanta ko xrotjue'enta sen. <sup>9</sup>Ja'anta no'anta ixi Ncháina Jesucristo, je'e ndo kuachónnda ndo kain ti tjintee, ko ixi tsango tjua'anta ndo, méxin, kuij ndo nunte xasintajni ko ikjan ndo xranchi naa ni nóa ixi jaña ja'anta xrochondanta kain ti tjintee.

<sup>10</sup>Ja'in xrontatjunta nge'e xraxa'on ixi jii'in. Nano kuatsinga ja'anta sa'ó kuaxi kuajonnta, ko tsango juaxruxin bake'enta ixi kuajonnta. <sup>11</sup>Jai xratajonta xranchi juangíxixín kuajonnta ó sa'ó; juaxruxin tájonnta ti chondanta. <sup>12</sup>Siá tjaunnta tsingijnanta sen kichuuna ixi jaña bake'enta ngaya asáanta, ndo Dio take'e ndo juaxruxin siá tájonnta nge'e chondanta ixi ndo Dio tjancha'i ndo nge'e chónnda'i chujni. <sup>13</sup>Tjaun'ana ixi tsingijnanta inaa sen ixi ícha xrochonda sen ko ja'anta xrochonda'inta. Jan'anna tja'onna ixi nataonxin xrochondanta. <sup>14</sup>Jai ja'anta chondanta, méxin chao tsingijnanta sen chónnda'i. Nchéxin tsii nchakon je'e sen xrochónnda

sen ko tsingijnanta sen kaxon, ko jaña nataonxin tsingijna kichuunta. <sup>15</sup>Xranchi ndachro xroon chijnie ndo Dio: “Sen jua'o kueya nge'e, xro'an nge'e ti jua'o sen xe'e, ko sen xro'an itsjé jua'o, xro'an nge'e titjáñe'e sen.”

#### Ndo Tito ko sen chrikao ndo

<sup>16</sup>Ko juasie ndo Dio ixi je'e ndo bake'e ndo ngaya aséen ndo Tito yaa ndo juachjaon ixi tsingijnanta ndo xranchi jan'an kaxon yaa juachjaon ixi ja'anta. <sup>17</sup>Ko je'e ndo bake'e ndo juaxruxin ixi sinche'e ndo ti kuetuan'anna ndo, ko jai je'e ndo tjaun ndo tsiji ndo, tsitsja'anta ndo.

<sup>18</sup>Kaxon ndo Tito tsjikao ndo naa ndo kichuuna, ko kain sen titikaon Ncháina chúxin sen ndo ixi jian juinche'e ndo ixra ti tjako chijnie ndo Dio. <sup>19</sup>Ko kain ni'ngo kuinche'e sen ndo ixi kaxon tsiki'anna ndo nchakon tsjasokianna tomi juakana. Kainna xronta'ana ixra ji'in, titika'onna ko chonda'ana ndo Dio juasaya ko tja'onna tsono'anta ixi nduaxin sinta'ana ji'i. <sup>20</sup>Ko tjaun'ana ixi xrojan ngisen xronichja ixi ndakua'i juinta'ana ixi tomi xraka. <sup>21</sup>Ko je'o tja'onna sinta'ana nge'e jian, ixi jaña Ncháina tsake'e ndo juaxruxin ko kaxon jaña tsikon chujni ixi jian nta'ana ixra.

<sup>22</sup>Kaxon xruan'anna inaa ndo kichuuna tsjikao sen. Je'e ndo jian juinche'e ndo itsjé ixra. Ko

jai ícha tjaun ndo tsingijna ndo ixi tsango chuntia<sup>c</sup> ndo ngajinnta. <sup>23</sup>Xraxaonnta ixi ndo Tito, ndo tjento, tingijnana ndo ixra nta'ana ngajinnta. Ko sen yuu tsjikao ndo, sen ni'ngo kuinche'e sen ixi tjaun sen tsiji sen ngajinnta ko jaña tsajon sen juasaya ngajin ndo Cristo. <sup>24</sup>Méxin, nche'enta nge'e jian ngajin sen xruan'anna ixi jaña tsikon sen ni'ngo kuinche'e sen ixi nduaxin tjeue'é kichuunta ko tsono'e sen ixi nduaxin nge'e nichjana ixi ja'anta.

#### Tomi xra'o tsingijna sen kichuuna

**9** <sup>1</sup>Ti xra'o tomi ixi tsingijnanta sen kichuuna titikaon Ncháina, íxrokonda'i xrokjin'anta ícha, <sup>2</sup>ixi sa'ó konóna ixi ja'anta tjaunnta xrobingijnanta sen, méxin chá'na ko ntatjan sen kichuuna ste nunte Macedonia ixi ja'anta, sen nunte Acaya, xra nano kuatsinga tjaunnta xrobingijnanta sen nóa. Ko sen kichuuna nunte Macedonia tsango tjaun sen tsingijna sen kaxon ixi ja'anta sa'ó juako'enta sen. <sup>3</sup>Méxin, xruan'an kaxin sen kichuuna tsiji sen ixi tja'on tsikon sen ixi nduaxin ja'anta ó stechon'ennta ixi tsajonnta nge'e tsingijnaxinnta chujni ixi jaña beki'a sen. <sup>4</sup>Nchéxin xrojan sen kichuuna nunte Macedonia tjaun sen tsjasokianna sen ko ja'anta xra tjao'anta tomi. Ko me'e tsosua'nana ixi sa'ó ndachrjanna

<sup>c</sup>8:22 *chuntia* tener fe

ixi ja'anta tsango tjaunnta tsingijnanta ko jan'anna chuntiana ixi jaña sinche'enta. <sup>5</sup>Méxin, xraxa'on ícha jian sa'ó xroxruan'an sen kichuuna ngajinnta ixi tsingijnanta sen ti xroxra'o tomi tsindachrona. Ko jaña tsikonni ixi ja'anta tsango tjaunnta tsingijnanta sen nóa ixi tje'e'enta sen ko je'a ixi jan'anna tetuan'anna sinche'enta me'e.

<sup>6</sup>Xraxaonnta ixi ngisen tajon'a itsjé, kaxon xro'an itsjé tayé'e sen, ko sen tajon kueya, kaxon kueya tayé'e sen. <sup>7</sup>Méxin, ngujngu ja'anta tájonnta nge'e xraxaon asáanta, ko sinchení'e'a asáanta nge'e tájonnta ko je'a ixi xrokonda tsajonnta, ixi ndo Dio tje'e' ndo sen juaxruxin tajon xrojan nge'e. <sup>8</sup>Ixi jaña Ndo Dio ícha sinchenchaonnta ndo ko tsajon ndo kain nge'e xrokonda'anta ixi jaña kaxon chao tsingijnanta ikaxin chujni. <sup>9</sup>Xranchi ndachro xroon chijnie ndo Dio:

Sen tonchjeya nge'e chónda sen ngajin ni nóa, kain nchakon xroxraxaon chujni ti jian juinche'e sen me'e.

<sup>10</sup>Ixi ndo Dio tajon ndo tsee tengani ko tajon ndo nge'e sineni, ko je'e ndo xrotjáanta ndo kain nge'e xrokonda'anta ko je'e ndo ícha tsajon ndo, me'e xrochondanta itsjé nge'e ko jaña tsingijnanta ni nóa. <sup>11</sup>Ndo Dio xrotjáanta ndo kain nge'e tjintee xrochondanta, jaña ja'anta kaxon chao itsjé nge'e tsajonnta. Ko

jan'anna tsiki'anna tomi me'e ko jaña ícha itsjé sen kichuuna tsajon sen juasaya ngajin ndo Dio ixi tomi tsajonnta. <sup>12</sup>Ixi tomi tsingijnaxinnta sen kichuuna, je'a je'o ixi sen kichuuna xrochóna sen nge'e xrokonde'e sen. Na'i, kaxon ixi jaña ícha tsajon sen juasaya ngajin ndo Dio. <sup>13</sup>Ko kaxon je'e sen ícha tsajon sen juasaya ngajin ndo Dio ixi nge'e kuajonnta ixi jaña tjakonta nduaxin titikaonnta chijnie ndo Cristo. Jaña kaxon ícha jjié juasaya xrochónde'e sen ndo Dio ixi ja'anta bingijnanta sen ko ikaxin chujni. <sup>14</sup>Ko je'e sen xronichje'e sen ndo Dio ixi ja'anta ixi je'e sen tja'anta sen ko ixi tikon sen ixi ndo Dio jian tingijna ndo ngajinnta. <sup>15</sup>Juasie ndo Dio ixi juinchekitojina ndo naa nge'e tsango tjintee, me'e ti tomé'e jíeeni, ko tsikixian'ina tsekina kain ti chjajina ndo.

#### Juachaxin kuajon ndo Dio ngajin ndo Pablo

**10** <sup>1</sup>Jan'an Pablo tinóatáana ngajinnta ixi ndo Cristo, ndo tsango jian ko tsango tjuajina ndo, ste kaxin na ndachro na ixi nchakon ritjén ngajinnta je'a ntajié aséenna, ko nchakon ritjén ikjín, tsango tojiena. <sup>2</sup>Méxin, nchakon tsjasotsja'anta tjancha'anta nche'anta ixi tsojiéna ngajin kaxin ni ndachro ixi jan'anna tja'onna tsjachana xrojan nge'e, xranchi nche'e ni nunte xasintajni. <sup>3</sup>Nduaxin jan'anna stena nti'i nunte xasintajni, ko maski jaña,

ntai'ana ti nge'e ndako'a xranchi nche'e ni titikaon'a ndo Dio. <sup>4</sup>Ko tjaya'ina ixi chika, chika tjayaxin chujni nunte nti'i. Na'i. Jan'anna nta'ana xrojan nge'e ixi juachaxien ndo Dio, ko juachaxin me'e chao tjankaxinna kain xra nche'e Xixron'anxrée. <sup>5</sup>Ko jaña kaxon tjankana ixra nche'e ni tjaun'a ixi ikaxin chujni tsichuxin na ndo Dio. Ko ixra nta'ana ixi kain ni chónda ijie tsindoxin na ti ndakua'i xraxaon na ko tsitikaon na ndo Cristo. <sup>6</sup>Ko jan'anna tsuyakutéena chujni tsitikaon'a ndo Cristo ixi jaña tsitikaon na ndo, ko jaña kainnta jian tsitikaonnta kaxon.

<sup>7</sup>Ja'anta je'o titikaonnta nge'e tikonnta. Ko ngisen xraxaon ixi nduaxin tikinixin ndo Cristo, tsono'e sen ixi kaxon jan'anna tikinixinnana ndo xranchi sen me'e. <sup>8</sup>Siá tsango nichja ixi richonda juachaxin tsituan'an, tosuana'i. Ncháina Jesucristo chjána juachaxin me'e ixi jaña ícha xrochuntianta ndo, ko je'a ixi me'e tsitjáñaxinnta. <sup>9</sup>Ko ti kjin'annta xroon xruan'annta, tjaun'a xroxraxaonnta ixi me'e xroxronkanta, <sup>10</sup>ixi ste kaxin sen ndachro sen ixi ti ikjin xroon tsango toña'o ngajinnta, ko nchakon ritjén ngajinnta xronkana ko kain ti nichja tjinte'a. <sup>11</sup>Ko ngisen jaña nichja, tsono'e sen ixi ti nchakon ikjin xroon xruan'annta ko ritjén'a ngajinnta, jaña kaxon tsjasotsja'anta naxraje'o xronichja'anta xranchi ikjin xroon xruan'annta.

<sup>12</sup>Nai'a xroxraxa'onna ixi tsango jian nichjana xranchi ste ikaxin na jaña nche'e na. Kaxin chujni xraxaon na ixi je'e na tsango tjintee na ko ikaxin na noe'a na, ni me'e tsango ninta xraxaon na. <sup>13</sup>Kaxon jua'i sintajie aséenana ixi nge'e nta'ana. Ndo Dio me'e ndo xrondachro nge'e sinta'ana ko ngajin ja'anta sinta'ana ixra me'e. <sup>14</sup>Jua'i ntaxruantana ixi ícha tituan'anna, ko chao xrondachrjan ixi jan'an sa'ó juaso ngajinnta ko juako'anta chijnie Ncháina. <sup>15</sup>Ko jua'i sintaxruanta ixi jan'an junta'a ixra juinche'e inaa ngisen. Jan'anna tja'onna ixi ícha xrochuntianta Ncháina, jaña jan'anna ícha sinta'ana ixra ngajinnta ko je'o ti tsituannana. <sup>16</sup>Kaxon tja'onna tsjakona chijni jian ne'e Ncháina Jesucristo ikaxin tjauna ti xraxro'an ngisen itji tjako ixi jaña xro'an ngisen xrondachro ixi jan'anna ntexruantana naa xra tsijinche'e inaa ngisen.

<sup>17</sup>Ko siá xrojan ngisen tjaun sinchejé aséen, chao sinchejé aséen sen je'o ixi titikaon sen Ncháina Jesucristo. <sup>18</sup>Ixi ndo Dio nichja ndo jian ixi naa ngisen ndako juinche'e ko chao'a ixi xrojan ngisen je'o sen sinchejé aséen sen ixi ndachro sen jian nche'e sen.

**Ndo Pablo ko sen  
nduaxin'a apóstol**

**11** <sup>1</sup>Tja'on tsin'ennta nge'e xrondachrjan maski xronichja xranchi naa sen ninta.

<sup>2</sup>Ndo Dio nchenóna ixi tsaxinta juachjaon ixi tja'on tsintue'anta ndo Cristo. Jan'an ó ntatjan ndo Cristo ixi tsaya'anta ndo xranchi naa nchrichajan tsixranchia ixi tsute'e ko tjúá aséen ko cuerpoe nchrichan ixi tsij nchakon tsute'e nchrichan ngajin naakua naa ndoxi'e nchrichjan. <sup>3</sup>Ko xronkana ixi xranchi kunchee tsango ña'i juincheye'e ba jan Eva; ko ba jaña sinchekachruenta ba ti xraxaonnta ko ti jian titikaonnta ndo Cristo. <sup>4</sup>Ixi siá tsij xrojan ngisen tjako inaa ndo Cristo, ko inaa espíritu ko inaa chijni ti je'a juako jan'anna, ja'anta tintu'enta ni me'e nche'e na ti tjaun na ko me'e ja'anta nta'anta juaxruxin. <sup>5</sup>Ko jan'an je'a ícha nuntena ixi ni ndachro apóstol na, ni nandá kuij, ni ndachro ícha tjintee, ni rué'e ja'anta. <sup>6</sup>Ko maski je'a ícha jian nichja jan'an, nduaxin ícha nóna chijnie ndo Dio ko ó itsjé vez juako'anta ixi ícha nóna.

<sup>7</sup>¿Á ndako'a junta'a jan'an nchakon juako chijnie ndo Dio ngajinnta ko juanchia'i ninaa tomi ngajinnta?, ko juntajié'a aséenna ixi jaña ja'anta ícha xrokuiteenta. <sup>8</sup>Ko jan'an kuayá'a tomi chjána sen kichuuna, sen jii ikaxin ni'ngo, ko tomi me'e kondana ixi juntakuan'an ja'anta. <sup>9</sup>\*Ko nchakon bake'e ngajinnta, xrokondana tomi, ko xro'an nge'e juanchia'anta. Ko kain nge'e kondana, sen kichuuna nunte Macedonia chjána sen ixi tjaun'a

kuajondaxin ixra ngajinnta ko jaña jai tsajonndaxin'a xra ngajinnta. <sup>10</sup>Ko jian nóna ixi chuxin chijni nduaxin ne'e ndo Cristo, ko xro'an ngisen nchijji nunte Acaya tsantsjena juaxruxin chonda. <sup>11</sup>¿Sonda ndachrjan ja'in? ¿Á ixi tjaun'anta? Ndo Dio no'e ndo ixi tsango tjua'anta.

<sup>12</sup>Ko xrajaña sinta'a tsjanchia'i tomi ngajinnta ixi tjaun'a ixi jaña ni nduaxin'a apóstol sinchejié aséen na ixi stencheye'e na chujni ixi je'e na ndachro na tikinixin'en na ndo Cristo ko xraje'o ixra nche'e na xranchi jan'anna. <sup>13</sup>Ni me'e je'a nduaxin apóstol na. Je'e na stencheya na ixi ndachro na tikinixien'en na ndo Cristo. <sup>14</sup>Ko kain ji'i sinchexronka'ina ixi noina ixi kaxon Xixron'anxrée ndachro xa ixi je'e xa naa ángel tingasáña ko je'a nduaxin. <sup>15</sup>Jaña kaxon ni nche'e xrée Xixron'anxrée ncheya na ixi ndachro na jian xra nche'e na. Ko nchakon tsjexin kain nge'e, tangi tson'en na ixi ndakua'i juinche'e na.

**Tangi ton'en ndo Pablo ixi  
ixra apóstol nche'e ndo**

<sup>16</sup>Íjngo ntatjunta: Tjaun'a xrondachronta ixi juntatjáña jáana, ko maski jaña xrokon'en, tintunanta xronichja ixi jaña chao sintajié aséenna naa nchíin. <sup>17</sup>Siá jaña ntajié aséenna naa nchíin, ndachrjan'i ji'i ixi juachaxien Ncháina. Na'i. Jaña jan'an

ndachrjan xranchi xrokjui nduaxin xrojuinchetjáña jáana. <sup>18</sup>Ste itsjé ni nchejié aséen ixi nge'e no'e nā, ¿sonda jua'i kaxon jan'an sintajíé aséenna? <sup>19</sup>Ko ja'anta ndachronta ixi no'anta ko juaxruxin taye'énta ni nduaxin tsijinchetjáña jaa. <sup>20</sup>Ko ja'anta tokuaxinnta tituan'annta nā ko ntajinta'anta nā ixrā ko tjenga'inta nā 'nā, tantsja'anta nā nge'e chondanta, ntaya'anta nā, ko tande'e nā itun ngaya ikonnta. <sup>21</sup>Maski tosua'na jan'an xrondachrjan ixi jan'anna junta'ina jaña.

Ko ti nchejié aséen nā, jan'an kaxon chao sintajíé aséenna, ko ndachrjan ji'i xranchi naa ni tsijinchetjáña jaa. <sup>22</sup>Je'e nā

chujni hebreo nā. Kaxon jan'an. Je'e nā chujni israelita nā. Kaxon jan'an. Je'e nā kuachrjenixin nā ndo Abraham. Kaxon jan'an kuachrjenixin ndo Abraham. <sup>23</sup>\*¿Á je'e nā nche'e nā ixrā ngajin ndo Cristo? Jan'an nduaxin nta'a ixrā ngajin ndo Cristo, maski je'a jian jan'an xrondachrjan. Jan'an ícha junta'a ixrā, jan'an ícha bija'na nā ndo'achjiso, jan'an ícha bikaon nā ko itsjé vez ndáxrokon'enna. <sup>24</sup>Na'ó vez ni judío juaya nā ngajin; ikántena kóñana nā ixi ino. <sup>25</sup>\*Níi vez ni tituan'an tjajna Roma juaya nā ngajin ixi ntasé, naa vez kuaxina nā ixro. Níi vez konunte



*Ti xrojamangitaon ntābarco tikao ndo Pablo  
(2Co. 11:25)*



ntábarco ngangi nda, ntábarco ritiki'an, naa vez naa tiie ko naa nchakon bake'é jan'on ngusine ndachaon. <sup>26</sup> \*Ikjín no kuaji. Tangi kuatsingatu'a ndajitinga, ko naa nchakon ngakona xiche'e. Kuatsinga itsjé juachjaon ngajin ni tjajnána ko kaxon ni je'a tjajnána, ko kaxon ti bakji tjajna, ntajie ko ndachaon ko kaxon xrokónana nã, ni nduaxin'a titikaon Ncháina Jesucristo. <sup>27</sup> Tsango junta'a ixrã ko itsjé nge'e tangi kónna. Itsjé tiie kuarichrin'a jian ko itsjé nchakon kuatse jinta, kuen'enna inda ko kuachónda'i itsjé manta tsaria, méxin tsango bakongína. <sup>28</sup> Ko maski kain ji'i kónna, nai'a tjáñana ixi kain ni'ngo ko ngujngu nchakon tsango kua juachjaon ixi kain sen xra'o ni'ngo. <sup>29</sup> Ngisen toni'e, ko, ¿á jan'an tonina'í? Nchakon xrojan ngisen nche'e naa nge'e ti ndakua'i ngajin sen kichuu sen, taa juachjaon ko toña'o. <sup>30</sup> Siá chao sintajié aséenna, sintajié aséenna ixi soji'ana. <sup>31</sup> Ndo Dio, Ndotée Ncháina Jesucristo, ngisen tikinixin'en kain juasaya,<sup>d</sup> no'e ndo ixi nduaxin nge'e ndachrjan. <sup>32</sup> \*Nchakon bake'é tjajna Damasco, xi baketuen'en nti'a, xi rey Aretas, kuetuan'an xa ixi xrotséna nã hora tsachrjexin tjajna ko xrobikaana nã ndo'achjiso.

<sup>33</sup> Ko sen kichuuna juankayana sen ngaya naa ntaxraxro ko juinchexingajinxinna sen ti jii naa ventana jichónda tjatu'o jii ngandajin tjajna, ko jaña sabinga ko itsé'ana nã.

### Nge'e ijíe bikon ndo Pablo

**12** <sup>1</sup> Xro'an nge'e tjachani xronichjani ixi jian je'eni. Maski, xrokonda xronichja ko tseki'anta nge'e bikon ko nge'e juinchenóna Ncháina Jesucristo. <sup>2</sup> Chuxin naa xi titikaon Ncháina ko chónda tenoó nano ikjui xa ti nínxin ngajní. Nóna'i á cuerpoe xa o aséen xa bikon ko ixi juachaxien espíritue ndo Dio. Je'o ndo Dio no'e nge'e nduaxin kon'en. <sup>3</sup> Ko nóna ixi xi me'e ikjui xa; nóna'i á ixi cuerpoe xa o na'i; je'o ndo Dio no'e ndo. <sup>4</sup> Ndo Dio bikao ndo xa ngajní, nti'a kuin'en xa kaxin nge'e tienxin'ani ko xro'an ngisen chónda juachaxin xronichja me'e. <sup>5</sup> Jan'an xrojuintajié aséenna ixi chuxin xi me'e, a kondee nge'e junta'a jan'an, jua'i sintajié aséenna, je'o chao xrondachrjan kondee nge'e tangi kónna. <sup>6</sup> Siá xrojuintajié aséenna je'a ixi juintatjáña jáana. Na'i. Ixi nduaxin nge'e jian junta'a ko sinta'i me'e ixi tjaun'a xroxraxaon sen ixi ícha nóna. Na'i. Cháña je'o syntaxraxa'on sen nge'e nta'a ko nge'e tin'en sen ti junta'a.

<sup>d</sup> 11:31 *juasaya* respeto, honor

11:26 a: Hch. 9:23; b: Hch. 14:5. 11:32: Hch. 9:23-25.

<sup>7</sup>Ixi ti bikon, ti juakona ndo Dio, tsango chaxro me'e, méxin tsango xrojuintajíéxin aséenna. Ko sinta'i me'e, ixi kuayá'a naa ichin ntau'na ko xinchexrée Xixron'anxrée tsango ncheni'e xa ntau'na ixi jaña sintajíé'a aséenna. <sup>8</sup>Méxin ó ní juanchia'a Ncháina Jesucristo tsantsjena ndo ichin me'e, <sup>9</sup>ko Ncháina ja'in ndachijina ndo: "Xro'an nge'e ícha xrokonda'a; je'o ti tsango tjua'a, ixi ti tsango ijíé juachaxin chonda jan'an, ícha tonoxin juachaxin nchakon naa chujni ícha soji'a. Juachaxin chóna jan'an tonoxin nchakon jua'i nche'e naa nge'e ja'ua." Méxin, juaxruxin tsake'é nchakon soji'ana ixi jaña ícha juasaya tsayé'e Nhána Jesucristo. <sup>10</sup>Ko méxin, ícha juaxruxin ritjén nchakon soji'ana, nchakon chujni tjakaxin na ngajin, nchakon xro'an nge'e chonda, nchakon tengina na, nchakon yaa juachjaon ixi kondee Nhána Cristo; nchakon soji'ana, nchakon me'e ícha tonsoji aséenna.

**Ndo Pablo taa ndo juachjaon ixi sen kichuuna tjajna Corinto**

<sup>11</sup>Ndako tsijintatjáña janáa nchíin ixi nichja nge'e jian juinta'a. Ja'anta chondanta ijie ixi ja'anta xrokonda jian xronichjanta ixi najan'an. Ko jan'an je'a ícha nuntena ixi xi apóstol kuintekii, xi ja'anta nta'anta juaxruxin rue'énta, maski jan'an xro'an tjinteena. <sup>12</sup>Ti konchrje'ana

juinta'a ixra ngakjen'ennta ko kain ixra ijíé ko kain ixra chaxro juinta'a ixi juachaxien ndo Dio ixi jan'an nduaxin naa apóstolna.

<sup>13</sup>Ko kain ja'anta nge'e ti ícha juintanuntenta ixi íkaxin sen kichuuna jii ikaxin ni'ngo, ixi sen jaán bingijnanana sen. Ko jan'an tjaun'a bingijnaninta ixi tjaun'a xrokuajonntaxin xra ngajinnta. Tjáña'anta ti ndako'a juinta'a ixi juanchia'inta xrobingijnaninta.

<sup>14</sup>Jai ó richon'an ixi tsjasotsja'anta nínxin vez ko jai kaxon tsajonndaxin'a xra ngajinnta ixi jan'an tjé'e'a tsayá'a tomianta. Na'i. Jan'an tjéé ja'anta ixi ja'anta ícha tjinteenta. Ixi je'a ichjan tjatsin'in xjan tomi tsayé'e ndotée xjan. Na'i. Ndotata me'e ndo xrokonda tsjatsi'in ndo tomi tsayé'e xjan. <sup>15</sup>Ko jan'an tsango ijíé juaxruxin chonda ixi sintexianxin tomina ixi ja'anta, ko jan'an kaxon, maski ícha taka tsondaxíina, ixi sinta'a ixra ngajinnta ixi jan'an tsango tjua'a asáanta, ko maski jan'an ngujngu nchakon ícha tjua'anta ko ja'anta ícha tjaun'antana.

<sup>16</sup>Ko maski kaxin sen ndachro sen ko titikaon sen ixi jan'an kuajondaxin'a xra ngajinnta ko ikaxin sen me'e kaxon ndachro sen ixi jan'an tsango nóna ntaya me'e imao kuantjsja'anta tomianta. <sup>17</sup>¿Á juintaya'anta nchakon xruan'annta xrojan ngisen tingijnana? <sup>18</sup>Nchakon ntatjan ndo Tito xrokuijtsja'anta ndo, je'e ndo ko inaa ndo

kichuuna, ndo Tito, ¿á juintaya'anta ndo? ¿Á nduaxin'a ixi kayui jan'anna xraje'o jian ixra nta'ana ko xraje'o Espíritue ndo Dio nta'axinna xra?

<sup>19</sup> Ja'anta stexraxaonnta ixi jan'anna nichjana ja'in ixi tja'onna ja'anta xroxraxaonnta ixi jian jan'anna, ko je'a nduaxin me'e. Na'i. Jan'anna ja'in nichjana ko ixra rinta'ana jitikon ndo Dio ko Ncháina Cristo, kain me'e nta'ana ixi tja'onna ícha tsitikaonnta Ncháina Cristo ixi tsango tjua'ananta. <sup>20</sup> Jixronkana ixi nchéxin nchakon tsjasotsja'anta, stenché'anta xranchi jan'an tja'on ko kaxon ja'anta já sinta'inta juaxruxin xranchi xronichja jan'an. Nchéxin stetetoku'u kichuunta, tochjuya'anta nge'e chónnda inaa sen kichuunta, stetoña'o'e kichuunta, stenchéjeé asáanta, stetjakaxin kichuunta ko stenchéke'to kichuunta. <sup>21</sup> Jixronkana ixi nchakon tsjasotsja'anta, jan'an tsango tsosua'na ngajinxin<sup>e</sup> ndo Dio ko xrotsjanga ixi kondaxin ja'anta ixi xratintue'anta kain ti ndako'a kuanche'enta, ti chondanta nchri je'a janchri'anta ko xi je'a ndoxi'anta.

#### Juexin kuetuan'an ndo Pablo

**13** <sup>1</sup> Jai ó nínxin vez tsjasotsja'anta. Xraxaonnta nge'e ndachro chijnie ndo Dio: Kain nge'e

tsochjian xrokonda tsake'e yuu o níi sen bikon nge'e kon'en. <sup>2</sup> Ó sa'ó ntatjunta ko jai íjngo ntatjunta maski ritjén'a ngajinnta, ja'in tsikjin ngajin sen ndako'a nche'e ko sen kaxin ixi ti nínxin tsjaso jai tsango tsoña'o'a sen ndako'a nche'e. <sup>3</sup> Ko nduaxin ja'anta tjaunnta tsono'anta á nduaxin nichja jan'an ixi juachaxien ndo Cristo. Je'e ndo nduaxin tsoña'o ndo ko nduaxin sintaña'anta ndo ijie. <sup>4</sup> Je'e ndo juako'a ndo juachaxien ndo ti kuen'en ndo nganito ntacru, ko je'e ndo jichón ndo ixi juachaxien ndo Dio, jaña kaxon jaína kuasoji'a aséeina, ko jai juasie ndo Dio ixi juachaxien ndo, kainna stechónna ko nta'ana ixra ngajinnta.

<sup>5</sup> Xraxaonnta, ¿á chao stenta?, ko, ¿á nchijí asáanta chuntianta Ncháina Jesucristo? O, ¿á tonoa'inta ixi ndo Jesucristo jii ndo ngajinnta?, o, ¿á nduaxin'a kuaye'enta ndo gaya asáanta? <sup>6</sup> Ko tja'on tsono'anta ixi nduaxin jan'anna titika'onna Ncháina Jesucristo. <sup>7</sup> Tjancha'ana ndo Dio ixi xro'an nge'e ndakua'i stenché'enta ko tjaun'ana ixi xrondachrjanna ixi jian juentakuan'annanta. Na'i, jaña ndachrjanna ixi tja'onna sinche'enta ti jian maski xrondachro ikaxin na ixi jan'anna je'a jian juakona. <sup>8</sup> Jan'anna xro'an sinta'ana ixi

<sup>e</sup> 12:21 *ngajinxin* delante de

tsomé'e ti nduaxin. Ko kain nge'e sinta'ana me'e ícha tsichuxinnta ti nduaxin. <sup>9</sup>Tsango chá'n̄na ixi ja'anta xraxaonnta ixi jan'anna soji'ana, ko ja'anta tsango sojinta. Ko jan'anna tjanča'ana ndo Dio ixi ja'anta ngujngu nchakon ícha jian tsitikaonnta ndo. <sup>10</sup>Méxin, ja'in kjin'annta jai ti ritjén ikjín ixi nchakon tsjasotsja'anta xrokonda'i ícha tsuyakutéenta. Ixi jan'an chonda juachaxin, juachaxin chjána Ncháina, ko juachaxin me'e xrokonda tsingijnaxinnta ixi ícha tsitikaonnta ndo ko je'a ixi sincheni'e asáanta.

<sup>11</sup>Jai kichuuna, take'énta juaxruxin, tingijna kichuunta ixi jian tsinteenta, naxraje'o xraxaonnta, t̄t̄okui'a kichuunta ko ndo Dio, ndo tsango tjaunna ko chjaina juaxruxin, tsake'e ndo ngajinnta. <sup>12</sup>Chje'é kichuunta juajna ko kainnta chonde'enta kichuunta juasaya. <sup>13</sup>Kain sen titikaon Ncháina ste nti'i xruan'annta sen juajna.

<sup>14</sup>Juachaxien Ncháina Jesucristo, ti tjua'anta ndo Dio ko juachaxien Espíritue ndo tsake'e ngaya asáanta kainnta. Jaña tson'en.